



Գևորգ Էմին

Հայաստանի գարունը

Ամեն գարուն՝ ինչքան ծանոթ,
Այնքան նո՛ր է ու ցանկալի՛.
Ամեն գարուն մի նո՛ր ձայնով
Ու նոր սիրո պե՛ս է գալիս.

- Տե՛ս, հավքերը հագարերանգ
Հին բնե՛րն են վերադառնում.
Ամե՛ն տեղ են դառնում նրանք՝
Բայց ուրի՛շ է Հայաստանում. –
Հայաստանում նրանց նման
Պանդուխտ հայե՛րն են ետ դառնում,
Ու բույն շինում, որ միշտ մնան
Հայության բո՛ւյն Հայաստանում...

- Տե՛ս, իր փեշերը հավաքած,
Ձմեռը սա՛րն է բարձրանում,
Ամե՛ն տեղ է սա անկասկած՝
Բայց ուրի՛շ է Հայաստանում, –
Ձյունից ծնված ամեն առվակ,
Մի գետի չափ գո՛րծ է անում,
Որ քա՛րն անգամ ծաղիկ դառնա
Մեր քարաշա՛տ Հայաստանում...

- Տե՛ս, բուրո՛ւմ են ծաղիկ ու սեզ,
Եվ հին սերերը՝ նորանո՛ւմ.
Ամե՛ն տեղ է գարունն այսպես՝
Բայց ուրի՛շ է Հայաստանում.
Դարավոր սի՛րտն է հայկական.
Իմ աչքերի դեմ մանկանում...
Չէ՛, գարնանն այս աշուն չկա՛ -
Հավե՛րժ է նա Հայաստանում...